

四庫全書

史部

欽定四庫全書

史部

山西通志卷九十三

詳校官監察御史<sub>臣</sub>查善長

檢討<sub>臣</sub>德生覆勘

總校官進士<sub>臣</sub>朱鈐

校對官學正<sub>臣</sub>常循

謄錄監生<sub>臣</sub>劉家璘

欽定四庫全書

山西通志卷九十二

名宦

十

汾州府

周

虞子羔嘗與咎犯有隙文公問咎犯曰誰可使為西河  
守者對曰虞子羔可公曰非汝之讐耶對曰君問可  
為守者非問臣之讐也羔見咎犯謝之咎犯曰薦子

者公也怨子者私也吾不以私事害公義子其去矣  
顧吾射子也

漢

常惠西河太守元狩四年大將軍青出定襄擊匈奴還  
吏卒無封者唯雲中太守遂成及惠受賞惠爵關內  
侯

杜延年字幼公南陽人周子明法律封建平侯宣帝即  
位益戶二千三百為西河太守治甚有名五鳳中徵

入為御史大夫卒謚曰敬侯

周舉字宣光汝南汝陽人博學洽聞京師為之語曰五  
經從橫周宣光舉茂才稍遷并州刺史太原一郡舊  
俗以介子推焚骸有龍忌之禁至其亡月咸言神靈  
不樂舉火由是士民每冬中輒一月寒食莫敢烟爨  
老小不堪歲多死者舉既到州乃作弔書以置子推  
之廟言盛冬去火殘損民命非賢者之意以宣示愚  
民使還溫食於是眾惑稍解風俗頗革後徵拜尚書

與僕射黃瓊同心輔政名重朝廷卒于光祿大夫詔  
令將大夫以下喪發日會弔加賜錢十萬以旌妻蛇  
素絲之節焉

張真字然明敦煌酒泉人舉賢良對策第一永壽元年  
遷安定屬國都尉時南部左真鞬臺耆且渠伯德等  
七千餘人寇美稷東羌復應之真屯長城因據龜茲  
縣東羌遂受盟擊真鞬破之伯德降遷使匈奴中郎  
將時休屠各及朔方烏桓燒度遼將軍門引屯赤院

烟火相望衆兵大恐真安坐帷中與弟子講誦自若  
軍士稍安乃潛誘烏桓陰與和通遂使斬屠各渠帥  
襲破其衆諸部悉降延熹元年鮮卑寇邊真率南部  
擊之斬首數百級後遷度遼將軍數載間幽并清靜  
九年春徵拜大司農鮮卑聞真去其夏遂招結南部  
烏桓數道入塞復拜真為護匈奴中郎將以九卿秩  
督幽并涼三州及度遼烏桓二營兼察刺史二千石  
能否賞賜甚厚南部烏桓聞真至因相率還降凡二

十萬口兵但誅其首惡餘皆慰納之唯鮮卑出塞去  
建寧元年封侯真深病為曹節所賣上書固讓後以  
黨錮歸田里卒

來歙新野人建武初拜大中大夫憂國忘家忠孝彰著  
嘗領兵於平遙縣築城禦寇後人名為來城卒謚節  
侯

馬襄為西河長史永平五年冬北部六七千騎入於五  
原塞遂寇雲中至原陽南部擊却之西河長史馬襄



赴救寇乃引去

馮立西河守善立條教吏民悅服

梁懂字伯威北地弋居人拜西域副校尉定龜茲永初三年冬南部與烏桓畔詔懂行度遼將軍事寇圍中郎將耿种於美稷連戰數月攻之轉急种移檄求救四年正月懂將八千餘人馳往赴之至屬國故城與南部左將軍烏桓大人戰破斬其渠帥殺三千餘人虜其妻子獲財物甚衆寇後將七八千騎進攻圍懂

謹被甲奔擊所向皆破寇遂引還虎澤三月行車騎  
將軍事何熙軍到五原曼栢暴疾不能進遣中郎將  
龐雄與謹种步騎萬六千人攻虎澤連營稍前寇乞  
降謹大陳兵受之會熙卒于師即拜謹度遼將軍明  
年以擅授南部優孤塗奴羌侯印徵下獄校書郎馬  
融訟其功後起拜謁者擊羌卒

崔鈞博陵安平人烈子少交結英豪有名稱為西河太  
守獻帝初與袁紹俱起兵山東討董卓

晉

賈渾太安中為介休令劉元海遣將喬晞攻陷之渾抗節不降曰吾為晉守不能全之豈苟求生以事賊何面目以視息世間哉晞怒執將殺之晞將尹崧曰將軍舍之以勸事君晞不聽遂害之

王雅新門人太寧初除汾州刺史勵精為政人庶悅附自遠至者七百餘家後拜少傅孝武將擢王恭殷仲堪雅曰仲堪謹於細行幹略不長四海無事必能守

職若道不常隆必為亂階矣帝不聽識者稱其知人  
北魏

穆羆崇四世孫襲宜都王尚新平長公主除征東將軍  
吐京鎮將羆賞善罰惡深自克勵時西河叛羆欲討  
之而離石都將郭洛頭拒違不從羆遂上表自劾以  
威不攝下請就刑戮高祖乃免洛頭官山賊劉什婆  
寇掠郡縣羆討滅之自是部內肅然莫不敬憚後改  
吐京鎮為汾州仍以羆為刺史前吐京太守劉升在

郡甚有威惠限滿還都民八百餘人詣羆請之前定  
陽令吳平仁亦有恩信戶增數倍羆以吏民懷之並  
為表請高祖皆從焉羆既頻薦升等所部守令咸自  
砥礪威化大行百姓安之州民李軌郭及祖等七百  
餘人詣闕頌羆恩德高祖以羆政和民悅增級延限  
後除中書監以穆泰故削封卒於家贈鎮北將軍恒  
州刺史

王慶祁縣人少敏悟有才略以戰功賜爵始安縣男歷

丹中二州刺史轉汾州為政嚴明人莫敢犯

房豹武城人任西河守為政清淨甚著奇績

隋

侯莫陳穎字遵道崇子賜爵廣平侯累遷開府儀同三司武帝時從滕王迥擊龍泉文城與柱國豆盧勣分路而進穎懸軍五百餘里破其三柵先是稽胡亂輒略邊人為奴婢至是詔諸部有厭匿良人者誅籍沒其妻子有人言為胡村所隱匿者勣將誅之穎曰將

在外君命有所不行諸部固非悉反但相迫脇為亂  
今慰撫自可不戰而定如即誅之轉相驚恐為難不  
細未若召其渠帥以隱匿者付之令自歸首則衆可  
安勸從之諸部爭降附北土以安後入隋累厯州郡  
以清德惠政稱開皇末檢校汾州事卒謚定

虞慶則京兆櫟陽人周宣政初襲爵沁源縣公除并州  
長史時稽胡數叛越王盛內史下大夫高頴討平之  
將班師謀須文武幹略者鎮遏表請慶則於是即拜

石州總管甚有威惠境內清肅慕義來歸者八千餘  
戶隋開皇元年遷內史監後以勳授上柱國封魯國  
公

楊子崇高祖族弟少好學有風儀恒典宿衛從幸汾陽  
宮屢請早還不納尋有雁門之役出為離石郡太守  
治有能名捕獲羣盜數千人太原兵至城陷為讎家  
所殺

李德饒趙郡柏鄉人大業末為離石郡司法書佐太守



楊子崇特禮之及子崇遇害棄尸城下德饒赴哭盡  
哀收瘞之至介休詣太原師請葬子崇唐公嘉之因  
贈子崇官令德饒為使者往離石禮葬焉

唐

王儉武德初石州刺史二年宋金剛破石州儉被殺

薛大鼎蒲州汾陰人父粹隋介州刺史大鼎武德初謁  
見龍門以功累拜涪州刺史徙滄州里民歌其美政  
卒謚恭

溫大有字彥將太原祁縣人義旗初舉高祖引為太原令從秦王徇西河將行高祖曰士馬單少須要經畧以君參軍事事之濟否卜是行也西河下攝大將軍府記室武德元年累轉中書侍郎卒謚敬

蕭顗武德二年為汾州刺史引丈水縣丈谷水入汾州溉田頡利入寇總管李神符敗之於汾東顗邀擊之獻俘五千

杜正倫相州洹水人隋時舉秀才唐貞觀中歷中書侍

郎兼太子左庶子坐貶久之授石州刺史顯慶元年  
累擢同三品遷中書令李義府構之貶橫州刺史卒  
楊越弘農仙掌人太宗初定天下網羅遺逸越曰天下  
有道可以出而見矣以角巾褐衣應命陳謨太宗曰  
石州邊方未沾王化汝往輯禦以息邊患任石州方  
山令見陳伯文集

房玄齡字喬齊州臨淄人年十八登進士大業末補  
隰城尉坐漢王諒徙義旗入關杖策謁太宗於軍門

署記室參軍貞觀中累拜司空知門下省事封梁國公卒贈并州都督謚文昭

李元名高祖第十八子封舒王貞觀二十三年為石州刺史性高潔不問家人產業朝夕矜莊門庭清肅常誠其子曰藩王所乏者不慮無錢財官職但勉行善事忠孝持身此吾志也在石州二十年賞翫林泉有塵外之意武后時遷利州遇害

薛季昶絳州龍門人武后時自御史左遷平遙尉復拜

御史預誅張易之進戶部侍郎尋貶儋州司馬仰藥  
卒景雲初贈左御史大夫

李道堅靈夔孫嗣魯王景龍中汾州刺史歷授河南採訪使以清毅稱卒贈禮部尚書

楊隆禮煬帝曾孫景雲中汾州刺史性清嚴能檢察人吏欺隱殆絕開元中封弘農郡公授戶部尚書卒

杜審言襄州襄陽人第進士為隰城尉歷修文館直學士卒贈著作郎

崔隱甫貝州武城人隋散騎侍郎儵之曾孫解褐左玉  
鈐衛兵曹參軍遷殿中侍御史內供奉浮圖惠範倚  
太平公主協人之女隱甫劾狀反為所擠貶邛州司  
馬玄宗立擢汾州長史兼河東道支度營田使累遷  
刑部尚書東都留守封清河郡公謚忠所至介潔自  
守明吏治以強正稱

薛元曖隰城丞卒於官祀名宦妻林氏丹陽太守洋之  
妹善屬文訓子彥輔等舉進士

楊仲昌字蔓虢州閿鄉人元琰之子開元中對策第一授蒲州法曹參軍判入異等遷監察御史坐累左遷孝義令撫字百姓耕桑樹藝莫不躬教一日方視事鸞降庭樹太守蕭恕表其政徙下邳令終吏部郎中仲昌資長於吏御身以約

陸璩字仲采蘇州吳人舉明經累除洛陽令中書令蕭嵩器之嵩罷他宰相出之為太原少尹天寶間徙西河太守封平恩縣男屬邑多虎前守設檻穽璩至徹

之而虎不為暴

薛從字順之龍門人平予以蔭累遷汾州刺史隄文谷  
瀘河二水引溉公私田汾人利之徙濮州終左領軍  
衛上將軍贈工部尚書

崔圖字有裕貝州武城人舉鈐謀甲科至德二載以成  
都儲供功拜中書令封趙國公乾元元年削除累改  
汾州刺史以治行稱卒謚昭襄

李勉字元卿鄭忠王元懿曾孫至德初拜監察御史累



為河東王思禮朔方河東都統李國貞行軍司馬累  
擢太常卿李輔國諷使下已勉不肯乃出為汾州刺  
史不威而治卓然有聲歷拜檢校司徒平章事封沂  
國公卒謚曰貞簡

裴遵慶絳州聞喜人世稱吏事第一上元中同平章事  
僕固懷恩阻兵汾上代宗以遵慶忠純特遣往汾州  
宣慰見懷恩具陳朝旨懷恩引過聽命將隨入朝旋  
為范志誠所惑以懼死為辭及乘輿幸陝遵慶自汾

州奔行在

劉暹南華人晏兄德宗時汾州刺史天資疾惡為觀察使所畏上徵之將用為御史大夫盧杞沮之終潮州刺史

崔弘禮博陵人磊磊有大志通兵略及進士第署東都留守元和中天子討蔡李師道謀襲洛脇阻朝廷以釋蔡危弘禮為緝搦賊情部分設張東都無恐遷留守判官擢汾州刺史官至刑部尚書贈司空

李漢隴西人。雍王六世孫。少事韓愈。通古學。屬詞雄蔚。剛烈類愈。愈愛重之。妻以女。擢進士第。遷右拾遺。以直諫坐婁。許出佐興元幕府。文宗召為屯田員外郎。史館修撰。論次憲宗實錄。書宰相李吉甫事。不假借。子德裕惡之。會李宗閔當國。擢知制誥。進御史中丞。吏部侍郎。初。德裕貶袁州。漢助為排擠。後德裕復輔政。漢坐宗閔黨出為汾州刺史。有美政。宗閔再逐。改為司馬崇祀。

賈耽字敦詩其先長樂人天寶十載舉明經累遷汾州刺史凡七年有異績建中時遷義成節度使淄青李納雖削偽號而陰蓄奸謀其兵數千自行營還道出滑或請館於外耽曰與我隣道奈何疑之弛柝罷禁門闢洞開命館城中宴無下士皆心服耽每獵從數百騎入納境納大喜畏其德不敢發異謀凡更四鎮踐履如一官至尚書右僕射同平章事

武昭陳留人果敢而辯嘗從裴度討淮西入蔡州說吳

元濟度鎮太原奏授石州刺史罷郡歸長安以氣使  
自許李逢吉欲沮度復相被誣死

魏謩字申之鉅鹿人文貞公徵五世孫太和進士累拜  
諫議大夫以直諫稱武宗初坐楊李黨出為汾州刺  
史再貶信州長史大中五年累拜同平章事十年出  
卒贈司徒宣宗嘗曰謩名臣孫有祖風然以剛正為  
令狐絢所忌讒罷之

宋

袁繼忠并州人。廕補右班殿直。平澤潞。討并汾。悉預攻。戰開寶中。以供奉官護隰州白壁關。屯兵破河東三。砦。俘獲萬計。迨戍將至。懼無功。受譴。以所獲分與之。遂與郭進略地忻代。太宗初。巡邊。部於唐龍鎮。征太原。預破鴈揚軍。先登陷陣。遼人入代境。擊走之。雍熙三年。以西上閣門使取飛狐。下靈邱。平蔚州。師還。為殿。行列甚整。遷引進使。卒。繼忠長厚。忠謹。家無餘財。人多稱之。

李謙溥并州孟縣人性慷慨通左氏春秋後周時嘗攝  
隰州事濬城隍嚴兵備并敵至謙溥登城徐步敵不  
敢動夜絕敢死士百餘薄敵營大破之開寶元年李  
繼勳征太原溥為汾州路都監在州十年敵不敢犯  
百姓又安遷齊州團練後邊將失律使為晉隰沿邊  
巡檢邊民喜之崇祀

孫冲字升伯趙州平棘人真宗時舉明經又舉進士歷  
通判晉州絳州至河東轉運使會南郊賞賜軍士而

汾州廣勇軍所得帛不逮他軍一軍大譟捍守佐堂  
下劫之約與善帛乃免城中戒備遣兵圍廣勇營冲  
適至命解圍弛備置酒張樂推首惡十六人斬之遂  
定初守佐以亂軍所約者上聞詔給善帛使者至潞  
冲促之還曰以亂而得所欲是愈誘之亂也卒留不  
與後以直史館知河中府徙潞州復為河東轉運使  
以諫議大夫知潞州遷翰林學士官至給事中卒  
杜衍知平遙縣謹密清整決訟明允



王益柔字勝之曙子伉直喜論事用蔭入官杜衍丁度宣撫河東寓書言河外兵饟無法非易帥臣轉運使不可因條其可任者衍度使還以學術政事薦知介休縣范仲淹未識而以館閣薦之除集賢校理仕至知制誥兼直學士院卒

趙瞻亳州永城人父剛太子賓客徙鳳翔之盤屋瞻舉進士第英宗治平初自都官員外郎除侍御史以濮議持詔曉天下及使還聞呂誨等諫濮議皆罷去乞

與同貶遂通判汾州政以愛民為本神宗朝遷司封  
員外郎知商州累官太常少卿戶部侍郎樞密直學  
士以中大夫同知院事卒車駕親臨輟視朝二日贈  
銀青光祿大夫謚曰懿簡有著述行世崇祀

田畫字承君陽翟人以從父況任入官知西河縣有善  
政民甚德之

張克戩字德祥開封人耆曾孫第進士宣和七年知汾  
州十二月金圍太原遣寧珠貝勒來攻克戩畢力扞

禦出不意焚其柵敵引去加直秘閣靖康元年六月  
金兵復逼城宣撫使李綱表其守城勞連進直龍圖  
閣右文殿修撰太原不守張思正張灝李宗奔慈隰  
麻世堅夜斬關出通判韓琬相繼亡克戢召令兵民  
曰太原既陷吾固知亡矣然義不忍負國家辱父祖  
願與此城終始以明吾節諸君其自為謀皆泣不能  
仰視同辭對曰公父母也願盡死聽命乃益厲兵徹  
守而援師訖不至平遙破介休孝義諸縣降金兩遣

使持書諭克戩焚不啟且述危苦狀募士間道言之  
朝不報十月朔有十人唱為降語斬以徇度不得免  
手草遺表及與妻子遺書絕州兵持抵汴明日金兵  
入猶帥衆巷戰金人募生致之克戩歸索朝服焚香  
南向拜舞自引決一家死者八人金將禮葬於後園  
為立廟事聞詔贈延康殿學士賜銀三百兩絹五百  
匹表揭門閭紹興中謚忠確

陳膏汾州教授佐守臣張克戩捍禦金人有功

賈亶汾州路兵馬都監與張克戡同死難

陳寅西河守金兵薄城寅竭智固守力不能支遂陷寅謂妻杜氏令避兵杜氏曰安有生同居祿死不共主事者即飲藥自殺寅遂伏劍死

王忠植紹興中取石州十一郡統領河東忠義軍馬遂知代州金圍慶陽急忠植將所部往援次延安為叛將所執俘械之金不屈死

金

郭企忠字元弼唐汾陽王子儀之後郭氏自子儀至承勳皆節鎮北方唐季承勳入於遼子孫繼為天德軍節度使至昌金降副使企忠襲父官金天輔中軍至雲中遣耶律坦招撫諸部企忠來歸軍帥命同勾當天德軍節度使事天會三年領西南諸部蕃漢軍兵為猛安從破宋雁門屯兵明年平五臺賊楊麻胡遷知汾州事是時汾州初下居民多為軍士掠去城邑蕭然企忠詣帥府力請願聽其親舊贖還帥府從之

未幾完實如故石州賊閻先生衆數萬至城下僚屬  
慮有內變請為備企忠曰吾於汾人有德保無他乃  
率吏民城守會援至合擊破之六年遷天德軍節度  
使後權沁州刺史卒

舒穆魯元毅咸平府路明安人明昌中以嚴遷汾陽軍節  
度副使時石嵐間賊黨嘯聚肆行剽掠朝廷命元  
毅捕之賊畏而遁元毅追襲盡殪之一境以安遷同  
知武勝軍節度使事別郡有殺人者屢鞠不伏元毅

訊不數語即具服河東北路田多山坡磽瘠大比時  
定為上賦民力久困朝廷命相地更賦元毅以三壤  
法平之民賴其利後戰歿於撫州

董時中字紹祖洛州人好學強記擢皇統九年進士調  
澤州軍事判官改平遙丞有劇賊王乙素凶悍不可  
制師中捕得杖殺之一境遂安時大軍後野多枯齒  
縣有遺櫬寓於驛舍者悉為葬之遷綿上令後仕至  
尚書左丞卒謚文定



郭震河間人孟門縣令才能恭勤革除奸弊威以馭吏  
仁以及民邑人立生祠

完顏宗璧金宗室同知石州軍事清白自持佐政有聲  
祀名宦

劉文通大定年任寧鄉令振興文教均賦寬民  
宋德玉泰和年任寧鄉令性聰才捷訟理化行

郭琪繁峙人孝友明律令達政事用法平允延祐初陞  
知汾州增秩朝列大夫

陸大用神峰人延祐中同知汾州廉公有威吏民畏服  
褚布哈字君實隰州石樓人泰定初補中瑞司譯史歷  
僉河西廉訪司事移淮東行郡至淮安禦紅巾多所  
斬獲請知樞密院老章以判官劉甲守韓信城相犄  
角復劾總帥逗撓狀朝廷錄其功擢廉訪使總兵恚  
嫉掇甲別將兵擊賊韓信城陷賊乃握壘相銜捷水  
寨以圍淮安布哈知事危退入城總兵屯下邳按兵  
不出遣使十輩告急皆不應城中更相食力窮城陷

布哈猶據西門力關中傷見執為賊所嚮時至正十六年十月己丑也布哈守淮安五年身經數百戰精忠大節人比之張巡云追封衛國公謚忠肅

完顏恩徹亨興定二年以節度守汾州蒙古穆呼哩破汾州出虎力戰死

元

杜豐字唐臣汾州西河人少有大志通兵法仕金為平遙義軍穆昆率所部來附從國王按扎爾攻平陽克

絳州解州諸堡招集流民三萬餘家金人南遁遂以  
豐守河北從下懷孟破溫谷木澗等寨及洪洞西山  
賊墮崖死以萬計金將武仙等抄掠授河東南北路  
兵馬都元帥便宜行事遂破玉女割渠等寨從攻益  
都金酋將突圍出豐戰扼之益都下遂略地登萊降  
島民萬餘以本部取沁州由是銅鞮武鄉襄垣綿山  
沁源諸縣皆下復撫定平陽太原真定及遼沁未降  
山寨所至悉平擢沁州長官在州十餘年寬徭薄賦

勸課農桑民以富足後請老卒於家沁人立祠祀焉  
子思敬世祖至元中累遷侍御史

高汝勵任石州歷戶部尚書器宇寬溫操行廉潔經國  
莅政綽有能聲

宋景初任寧鄉令經學淑人德化敷治奸黨震伏善類  
獲安

王翼甫平陽人大德中知平遙縣守已安民去任民思  
不忘

齊思古榆次人至順初知平遙縣愛民如子興利除害  
境內安堵去任民有餘思

高本冀路人至正間知平遙縣廉以持己仁以愛民鋤  
强扶弱民安時靖

武弁少通書史十八歲任平遙尹歷官少中大夫

蔡演至正間任寧鄉令天性挺秀持身清慎政善化洽  
人皆頌之

楊乘字文載濱州渤海人至正初為介休縣尹民饑為

盜賊立法招之使自新皆棄兵頓首願為良民

程邦彥祁丘人善詞章工草隸賦詩撰文稱三絕任汾州同知奉法循理郡人德之有遺愛碑

李朝英孟縣人金進士孝信孫至正間判汾州有政績韓謙河南人至正間知平遙縣公勤廉慎三年如一日被朝命問理賊黨滌除冤濫活者數百家有德政碑馬麟至正二十六年知臨縣開誠率物制造房舍崇尚學校政績至今賴之

朱守謙河南汝寧人至正中寇入孝義焚劫甚慘守謙  
由總兵都鎮撫司經歷署孝義縣事撫傷殘恤困苦  
招徠逃潰者復其業又定團練之規設防禦之略立  
科差之等開渠堰之利不數月民若更生立石表績  
周景福南陽人益門令政簡刑清民安物阜嘉禾紀瑞  
者再

明

顧碩天台人元時進士洪武初任石樓縣能才善治百



廢具興民多受其福奉祀春秋至今感慕

殷近仁嘉興人博學能文與其弟原誠原善友愛無間  
言家貧親老同心協力以供甘旨之養洪武初以孝  
弟舉授平遙知縣未幾親喪葬祭盡禮服終以所著  
蒞政戒銘四十二篇獻之於朝擢廣西參政

弗志道洪武八年任汾州知州厲精治具壇墀廟祠學  
校官署以次畢舉而勞來有方閭里不擾人咸稱之  
齊政山陽人洪武十一年任孝義令每黎明起視事無

繁簡皆立判暇則循行阡陌導民樹藝野無曠土俗  
臻富庶陞戶部郎中

許孟和鄞縣人洪武間石州學正時天下初定學校廢  
弛孟和修建廟學齋舍朝夕率諸生講質經史在所  
造就者入宦皆有實效

葉伯巨字居升寧海人以國子生授平遙訓導洪武九  
年上書曰臣觀當今之事矯枉太過者三曰分封太  
侈也曰用刑太繁也曰求治太速也何以明之今裂

土分封使諸王各有土地蓋懲宋元孤立宗室不競之弊而秦晉燕齊梁楚吳蜀諸國無不連邑數十城郭宮室廣狹大小亞於天子之都優之以甲兵衛士之盛臣恐數世之後尾大不掉然後削其地而奪之權則必生缺望如漢之七國晉之諸王否則恃險爭衡否則擁衆入朝甚則緣間而起防之無及矣昔賈誼勸漢文帝盡分諸國之地空置之以待諸王子孫願及今諸王未之國之先節其都邑之制減其衛兵

限其疆理亦以待封諸王之子孫古之為士者以登仕版為榮以罷職不叙為辱今之為士者以濶跡無聞為福以受玷不錄為幸以屯田工役為必獲之罪以鞭笞捶楚為尋常之辱其始也朝廷取天下之士網羅摺撫務無餘逸有司敦迫上道如捕重囚比到京師所學或非其所用所用或非其所學洎乎居官一有差跌苟免誅戮則必在屯田工役之科且鳳陽皇陵所在龍興之地而率以罪人居之捕賊數年既

無其方而乃歸咎於新附戶籍之細民而遷徙之近者已納稅糧之家雖承旨分釋還家而其心猶不自安已起戶口雖蒙憐恤而猶見在開封祇候詎言驚動不知所出太原諸郡則又外界邊境民心如此甚非安邊之計也今州縣方春下一白帖督里甲課農桑回申文狀而已守令未嘗親視種藝次第旱澇戒備之道也四方師生缺員甚多縱使具員守令亦鮮有以禮讓之實作其成器者朝廷切切於社學屢行

取勘師生姓名所習課業乃令廂鎮城郭或但置立  
門牌遠村僻處則又徒存其名守令不過具文案備  
照刷而已上官分部案臨亦但尋習故常檄取遵依  
未嘗巡行廉訪也又升於太學者或未數月遽選入  
官間或委以民社臣恐其人未諳時務未熟朝廷禮  
法不能宣導德化須令在學肄業或三年或五年精  
通一經兼習一藝然後入選庶無敗事且可以塞覲  
覲富貴僥倖爵祿之心也書上上大怒曰小子間吾

骨肉速逮來吾手射之既至丞相承上喜乃敢奉命  
繫刑部獄瘐死獄中先是伯巨將上書語其友曰今  
天下惟三事可患耳二事易見而患遲一事難見而  
患速其意蓋謂分封也迨洪武末年燕王奉命屢  
出塞後遂興靖難之師人以伯巨為先見云

武信滁州人洪武間知介休縣持身以廉牧民以德縣  
署學校壇墀廟祠多所增創後陞陝西僉事人多思  
慕之

紀正隴州人洪武間知汾州有善政歷陞府尹

韓偉淳縣人洪武間知平遙縣清慎仁恕庶務畢興

衛健洪武間任孝義縣縣丞讀書習吏事好談古今忠

孝節義靖難師起慷慨臨戎率所部禦之以身殉祀

名宦

宋秉彛字孝先江南淮安人洪武間任石樓縣主簿有

長材佐令顧碩修學宮庀材鳩工最力值歲凶賑濟

有法民多全活後擢馬邑縣丞



張軌清潤人永樂初以監生知吉州起復汾州政善民  
安任滿奏留加四品俸後以疾致仕

陳道宣德間知石州刑清政簡有德政碑

閻昇陳州人正統初知介休縣蒞政不苟撫字有方因  
民逋逃為之申免糧稅後卒於官居民巷哭之

李善歧山人正統間以進士知汾州重建州治脩舉廢  
缺廉以律已勤以愛民歷陞真定知府

王儉平涼人正統間知介休縣愛民如子有犯不忍加

刑

張雲平谷人景泰四年以舉人知臨縣廉潔無私政事  
修舉庭無獄訟學校振興陞濮州知州至大同府知  
府祀名宦

王澤沾化人景泰間以監生知介休縣法令嚴明威制  
豪強人心帖服兩廡齋舍皆所增修

馬榮長汀人景泰間以監生知石樓縣威德鴻才時皆  
頌之

沈純東平州人景泰間知孝義縣甫下車即飾學宮庀祭器整壇壝修城隍邑有王才里當西出之路山東岷艱於行隳高堙下俾十餘里間曠坦可通兼軌民以負租逃者招之復業蠲其租既去民思之不忘立遺惠碑

彭鏞湖廣石首人景泰間任介休縣知縣性廉介涖官以公勤著嘗疏水利蠲逋賦繕城郭凡利於民者無不舉祀名宦

梁杲景泰時知寧鄉縣嚴明有才略承己已變創建城池永為保障民甚德之

汪清固始縣人景泰間進士授監察御史嚴毅剛正因忤權貴天順元年左遷知臨縣興學勸農通水利減徭役鋤強梗旌善良凡有便於民者以次修舉丁外艱去士民送之至有涕泣者祀名宦

葉穆福建人天順初以舉人知汾州一年調吉州巡撫都御史李侃薦其去汾人思到吉人悅一廉如水六

事孔修陞河間府同知

姚昱天順間知寧鄉縣性坦易遇事明決公以持已勤以蒞政卒於官見遺政記

田愉安化人天順間以舉人知平遙縣邑素號難治愉以清介自持蒞事精察鋤奸去暴人以剛大稱之

伍琇松溪人天順間以舉人知吉州尋以賢能調汾州詔旌異之

劉鉞撫寧人成化初知介休縣以廉明稱卒於官

張瓚當塗人成化間由監察御史知介休縣愛民禮士  
不畏強禦政聲丕著

李瓊河南孟縣人成化十三年以舉人任孝義縣知縣  
清敏有特操中貴過縣頗橫肆多需索一無所應逼  
之則徑解衣以奉中貴愕然為愧謝嘗被誣繫獄事  
白復涖縣事節操愈勵

高俊膚施人成化中以舉人任汾州同知剛方自任州  
北有峽路阻澗多伏盜俊伐石塞澗行旅賴以無患

才寬字汝栗直隸遷安人成化間以進士任石州知州  
宏達精敏有經世略調繁潞州後以兵部尚書總制  
三邊仗節死義祀名宦

海鯉江夏人弘治間以進士知汾州政尚廉察發姦摘  
伏如神居一載卒民悲思之

鄭紀中牟人弘治間知石樓縣鋤強拯弱勸士愛民尤  
以冰蘖自持每朔望謁城隍誓不改操

張恕汧陽人弘治間知平遙縣歷九載仁愛如一日陞

知汾州民李華等弗忍舍奏允食知州俸仍治邑事  
郝槃綏德州人弘治中由代州判官陞任介休臨政剛  
明事無巨細胥迎刃而解後陞知潞州去之日百姓  
攀轅泣留為立去思碑

王道山東曹縣人弘治間以舉人任石州知州慈祥愷  
惻均賦役折獄能令民感化庭累月無人跡蒞任九  
年去民作歌頌之

李崇直隸清苑人正德八年以舉人任汾州知州慷慨



有大節為政以惠民為務雅甘澹泊善理煩治劇後  
歷松江太原二府同知擢戶部郎中歿不能斂里人  
葬之立清白吏碑焉

何賢河間人正德間知汾州為人個儻政尚惠和愛與  
小民親狎鄉村社會邀飲皆赴亦無廢事居歲餘卒  
郡人德之為肖像以祀

郁浩永寧衛人正德間以進士知汾州政尚簡嚴力興  
學校每朔望為諸生講說經義亹亹不倦時廟學頽

圮大加修葺增築泮池及龍池陞戶部員外至按察  
僉事

王天祐陝西慶陽衛人正德間以舉人任介休縣知縣  
家貧少與羣兒牧崆峒李夢陽遇之嘆其神俊授以  
學即能領受臨魯公帖即神似嘗徵修孝宗實錄及  
涖縣事簡要務存大體而吏民咸畏服如神有分巡  
過縣怙勢接不以禮天祐怫然解組歸

閔以仁渠縣人正德間自華陰簿擢孝義縣性勤敏日

夜不輟課樹藝興學政給諸生楮膏之費時拔其優劣繼修孔廟浚築城隍幹理有餘才未幾卒於官士民嘆惜之

李承嗣長安人正德間以舉人知臨縣性節儉歷官六載終始如一外和內剛剪除土惡有古良吏風陞通判

李詔開州人正德間孝義教諭立身清慎教條嚴明諸生有不修其行者輒斥責之士習頓改

王仁盤屋人嘉靖初任石樓縣安集流離歲荒賑濟恤民任事勤慎廉明政蹟彰著

郭鑑陝西咸寧人嘉靖二年以舉人授汾州知州深沉有志操砥礪廉隅明習法令政暇引諸生與上下其議論聞者興起尋擢戶部員外郎累官布政司左參議

孫剛蔚州人嘉靖中以世襲指揮僉事守備永寧懷仁有警剛督兵赴之時縣故無兵而剛所統又甚寡敵

前後至者且數萬人剛慷慨誓士期與城共存亡城破遂以身殉事聞諭祭二壇晉其子二級

王錦曲周人嘉靖間以舉人知孝義縣因母言乘輿勞民遂乘馬斥輿不復御與民平易有古人風每延禮諸生講論亹亹

侯嘉晏江南徽州人嘉靖間以舉人任石樓縣知縣御民以寬不喜事鼓撲民胥安之嘗為歌稱其儉約廉仁能福庇斯民後擢河南府通判

齊宗堯直隸昌黎人嘉靖四十五年以選貢任汾州知州忠直有膽略遇事慷慨直前隆慶丁卯北敵入寇抵城下宗堯登堦設守具指授捍禦方略卒得保全加銜河東運司同知仍管汾州事尋調忻州

陶璽山東威海衛人嘉靖間以太學生任石州州判有清操恥與俗伍常思以功名見歲饑賊起據劉王暈為巢穴犯黃蘆嶺逼吳城璽督部下閭大剛王天祐等徑往遏之賊聞退保暈上璽追至黑暗嶺遇伏兵

大清璽負高出戰甚力與大剛天祐俱死子化甫年  
十五具疏闕下復念父暴骨異地母與弟俱無依亟  
返至壽陽卒於旅邸後朝廷憫其忠贈石州知州廕  
子傳入監除詹事府錄事

李完陝西涇陽人嘉靖間任寧鄉縣典史性廉潔不以  
末僚自菲薄自始至終厲清苦如一日善折疑獄時  
人以青天呼之

劉坤壽張人嘉靖間由萬安縣擢知汾州廉靜簡明民

忻忻望治

脫鎬新河人嘉靖間由舉人知臨縣勤敏慈仁繕城修堤賑荒編甲減徭役其茂績尤在遷建學宮開多士文明之盛

李光米脂人知石樓縣民歌曰石樓李侯庶績克修民安政舉四境無憂

劉紹恤浙江人以進士知石樓縣寬徭賦以遂羣生勤督課以成多士



張軾嘉靖間知寧鄉縣居官清謹事母以誠孝聞每公  
餘輒詣席跪問安否及母卒扶柩歸葬廬墓踰年卒  
任大伯華陰人嘉靖間以舉人知臨縣慎以持己仁以  
愛民勤以立政未幾改調士民深感立去思碑

賀國定獲嘉人嘉靖間以舉人知臨縣剛方持己清白  
敢言治邑如家愛民如子陞徽州有去思碑

李昇嘉靖間以舉人知石州勸農桑重教化旌節義去  
之日百姓皆感泣

王三益永城人以舉人知石樓縣刑清政簡育才愛民  
陳情深州人嘉靖末以舉人知孝義縣操守甚堅時有  
邊警竭力捍禦卒保無虞修繕磚城百世永賴

岳維華曲周人隆慶初以進士知平遙縣剛介不阿廉  
明白勵建敵樓築敵臺以備守禦陞同知

孟一脈字淑孔東阿人隆慶五年進士為平遙知縣以  
廉能擢御史仕至南贛巡撫卒

李春芳直隸井陘人隆慶間以太原府同知署石州事

時州經新破春芳加意撫綏恤死慰生不遺餘力復  
以其暇繕城池飭廟學殘疆復完祀名宦

劉一任萬厯間知汾州府為清官第一向有石鴈照汾  
州清官不到頭之謠一任鑄鐵鳳鎮之權憲副去

陳翔鸞閩縣人萬厯間以舉人教諭介休學博行潔每  
以甘貧嗜學訓諸生修育材館羣其中而督課之多  
所成就陞徽州府判

尹覺民萬厯間以進士知汾陽縣居官廉幹著有能聲

政以利民善俗為大端而舉墜補偏尤令汾者不可  
及

魏學徵咸陽人萬厯二十六年以舉人知平遙縣清廉  
果斷民為建祠立碑

楊天璋永昌衛人萬厯四十二年由選貢知平遙縣操  
凜冰霜政宗簡要裁狐鼠革收頭居官二載而卒遠  
近咸哀傷焉

楊廷謨清苑人萬厯四十四年以舉人知平遙縣蒞事

風生撫民如子建文昌閣奎星樓清田畝稅課修文  
廟舉祀典不媿循良陞光祿寺署正

夏惟勤直隸冀州人萬歷二十三年以監生知永寧州  
修學築城督課士子砥礪鄉約時回鶻為患率鄉兵  
大破之陞青州府同知去任之日老幼涕泣建生祠  
於東關

楊正達武陵人萬歷間以舉人任鄉寧縣清操絕俗推  
誠待人歲旱禱雨輒應民立祠祀之

公一楊蒙陰人萬厯間以舉人知寧鄉縣端嚴有體無苛政汰丁減徭民甚戴之官至郎中

郭然咸陽人萬厯間以舉人知寧鄉縣明作果斷人號神君不苛不擾上信下畏

諸葛昇浙江壽昌縣人萬厯四十五年由選貢任臨縣風格清奇文詞俊逸多有惠政其葺西城興水利具載碑記去後士民建祠康熙二十五年知縣莫友仁詳准祀名宦

張問仁邢臺人萬厯間以舉人知臨縣平易近民端方持已諸所建置各有其功愛去人多思慕之

李先成長垣人天啓間以舉人知平遙縣重士撫民抑強維弱有風力聲卒於官人皆惜之

仇秉忠歙縣人崇禎間以貢知永寧州學政俱優招撫流移勤課士子陞杭州同知有去思碑

楊學程陝西漢中人崇禎間以舉人任永寧州知州天資明敏遇事洞見本末吏民畏服後擢成都同知去

民立祠祀焉

王凝命昆明人崇禎間以進士知平遙縣造大砲建學宮禱雨立應處已廉潔歷陞薊州道

劉光祚字洪基榆林衛人崇禎三年為汾州參將五年勝賊張有義于臨縣軍復敗旋復臨縣六年擊斬隔溝飛撲天虎于石樓又敗撲天飛于臨縣加署都督僉事為山西副總兵復葺縣城八年賊渠活地草見其黨劉浩然高加計破滅偽乞降光祚伏兵斬之活



地草即賀宗漢也晉中羣盜皆盡十四年南陽陷殉城

費甲總陝西咸寧舉人先尹平遙有善政崇禎六年調繁汾陽平人老穉扳轅立去思碑涖汾端方不阿權貴時流寇蔓延巡撫許鼎臣以曹文詔軍平定備太原東太監閻思印同總兵張應昌軍汾州備太原西賊至彰德應昌等出兵進勦甲總為閻所逼投井死宗紳士庶皆枕屍哭劉太監聞之抗疏白其寃

魏錫祚陝西固原人崇禎六年以貢監任臨縣知縣臨  
先為寇陷雖經新復餘孽猶間起錫祚撫養殘黎以  
身捍衛凡五年盜靖民安治行最著後致政歸士民  
攀轅泣送數十里不絕建祠祀之

楊家龍字惕若曲陽人繇歲貢生為寧鄉知縣民遭兵  
亡徙過半撫之七年皆復業以薦遷忻州知州受事  
甫數旬賊即至召語士民曰此城必不守吾出若輩  
可全也挺身出城罵賊而死士民祠祀之

侯君昭為汾州知府崇禎末城破不屈死

劉必達崇禎末為汾陽知縣城破死之義勇范奇芳亦  
自刎

國朝

王之佐浙江人順治二年任臨縣典史姜逆之亂知縣  
張耀祖殉城之佐領民兵急趨上趙寨誓擒渠魁以  
圖恢復力不支為賊所獲義不屈膝罵賊而死賊黨  
壯之

王昌運沙河人順治二年以貢知寧鄉縣性坦率而執  
守殊確雖臨以利害不動涖官時萑苻未靖一日數  
驚昌運整暇肅謐民安其業旋為賊黨所害識者惜  
之

黃廷栢遼東人順治五年任汾州府知府不毛舉細務  
而事胥綜理姜逆亂以守城為賊害

贈太僕寺卿祀忠烈祠雍正二年

御賜成仁取義匾額敬懸祠內

張耀祖遼東人順治六年任臨縣知縣姜逆之亂賊黨來攻耀祖曰此吾效命之秋也遂力守以死

贈按察司僉事祀忠烈祠

王之儀字虞廷遼東廣寧人順治七年以任子知寧鄉縣時姜逆初平逋亡幾半之儀遍招徠且為規畫生計民稍復業嘗大雨水暴漲毀城垣十丈有奇之儀立淋潦督衆完築躬負土石城獲無圯水退築護城堤於外樹柳其上往來者胥頌焉尋遷海寧知州後

以福州知府死耿逆之難

周士章上元人順治十三年以舉人知石樓縣石樓故  
屈地在萬山中土尤瘠重以闖寇姜逆後先肆虐衙  
蠹市魁多朋奸民日凋敝士章性硜潔不以家累自  
隨泣任得主名按治之不少假條列利弊雖大吏不  
為囁嚅平徭弭盜通商勸墾期年民始蘇簿書之暇  
嘯詠溪山在官三年憂歸士民謠誦具石樓志

周召南遼陽人順治中知汾州府時寇亂初定村落中

眇炊烟召南下車以招徠綏輯為務而武斷舞文為  
民害者搏擊之不遺力嘗下教屬邑徭賦有當開豁  
者有當均平者悉以告吾將為民請命令下比屋歡  
呼泣任三年遷山西驛傳道汾人立碑道左誌遺愛  
焉

姚開先字堯門陝西淳化人康熙年由拔貢生任臨縣  
知縣以清惠著聲後補四川鹽井經歷吳逆之變被  
執不屈死

任珣號希菴山東高密縣人順治辛丑進士康熙八年  
任石樓縣寬嚴並濟招流移復逋賦禁陋絕耗才敏  
識明歷任浙江道御史長蘆鹽院

張恪涇陽人康熙十年以舉人知平遙縣性峭直慷慨  
誠心愛民尤重士類人不敢干以私日用胥自給無  
行戶邑有豪惡噬民廉知其狀立斃杖下上憲咸嘉  
獎之以母憂去至今人稱清廉張公

龔應霖字雨亭廣東四會人康熙二十二年以舉人任



寧鄉知縣縣在萬山中多虎患應霖始至虎遁去循聲卓然久之擢刑科給事以去後以工科掌印卒於邨

張泰孚山東淄川人康熙二十六年知孝義縣有清操嚴馭胥吏而不任喜怒勤於其職早起理訟獄不遑食夜漏數十下猶危坐治文書不輟邑人頌之

呂履恒河南新安人明大司馬忠節公維祺之孫也康熙三十八年以進士知寧鄉縣性慈恕撫羸弱尤有

恩庭幾絕笞朴而善治豪猾武斷舞文者胥斂迹惟  
科自為籍時召鄉里民參驗吏無得中飽雅工詩文  
能以經術飾吏治培養士類尤篤親第甲乙口授指  
畫多獲雋以去後以治行擢御史累官戶部左侍郎

山西通志卷九十二

欽定四庫全書

山西通志卷九十三

名宦 十一

大同府

周

李伯齊人趙孝成王悅之以為代郡守人告伯反孝成王方饋不墮食告者復至王不應已而伯使言齊舉兵擊燕恐其擊燕為名而以兵襲趙故發兵自備今

燕齊已合臣請要其敝而地可多割自是從事於外者始不自疑於中

趙固為代相武靈王十八年秦武王卒王使固迎秦公子稷於燕送歸立為秦王是為昭王二十年又使固主胡致其兵

漢

張蒼陽武人好書律歷張耳歸漢漢以蒼為常山守從淮陰侯擊趙蒼得陳餘趙地平以蒼為代相脩邊寇後復以代相從攻臧荼有功六年封北平侯食邑千

二百戶文帝四年為丞相景帝六年卒謚曰文侯

傳寬賜號共德君封陽陵侯七年四月擊陳豨屬太尉  
勃以相國代丞相噲擊豨一月徙為代相國將屯二  
歲為丞相將屯孝惠五年卒謚曰景侯

孟舒嘗事趙王張敖高帝八年貫高等謀發詔捕敖羣  
臣有敢隨趙王罪三族惟田叔孟舒等十餘人赭衣  
自髡鉗隨敖至長安敖事白得出進言叔等十人上  
召見與語漢廷臣無能出其右上悅盡拜為郡守諸

侯相舒為雲中守孝文帝初立召漢中守田叔問曰  
公知天下長者乎對曰臣何足以知之上曰公長者  
宜知之叔頓首曰故雲中守孟舒長者也是時舒坐  
寇大入雲中免上曰先帝置孟舒雲中十餘年矣虜  
常一入舒不能堅守無故士卒戰死者數百人長者  
固殺人乎叔叩頭曰夫貫高等謀發下明詔趙有敢  
隨張王者罪三族然孟舒自髡鉗隨王以身死之豈  
自知為雲中守哉漢與楚相距士卒罷敝而冒頓來

為邊寇孟舒知士卒罷敝不忍出言士爭臨城死敵  
如子為父以故死者數百人孟舒豈毆之哉是乃孟  
舒所以為長者于是上曰賢哉孟舒復召以為雲中  
守

魏尚槐里人為雲中守其軍市租盡以饗士卒私養錢  
五日一椎牛饗賓客軍吏舍人匈奴遠避不近雲中  
塞寇嘗一入尚率車騎擊之所殺甚眾坐上功首虜  
差六級削官後文帝以馮唐言令唐持節赦尚復以

為雲中守

李廣隴西成紀人世世受射景帝時為雁門雲中太守  
武帝即位左右言廣名將也入為未央衛尉後為驍  
騎將軍屬護軍將軍軍馬邑旁漢軍皆無功後四歲  
以衛尉為將軍出鴈門塞北兵多破廣軍生得廣單  
于素聞廣賢令曰得李廣必生致之騎得廣廣時傷  
置兩馬間絡而盛之卧行十餘里廣陽死睨其旁有  
一兒騎善馬暫騰而上馬因抱兒鞭馬南馳數十里



得其餘軍騎數百追之廣行取兒弓射殺追騎以故  
得脫至漢贖為庶人元朔六年廣復為將軍出定襄  
諸將多為侯者而廣軍無功廣歷七郡太守前後四  
十餘年得賞賜輒分其麾下飲食與士卒共之家無  
餘財終不言生產事將兵之絕處見水士卒不盡飲  
不近水不盡餐不嘗食寬緩不苛士以此愛樂為用  
為人長援臂其善射亦天性雖子孫他人學者莫能  
及塞北嘗號曰飛將軍元狩四年大將軍驃騎將軍

出塞令廣并於右將軍趙食其軍出東道回惑失道  
後大將軍長史急責幕府上簿乃自剴百姓聞之知  
與不知老壯皆為垂泣廣子椒為代郡太守

辛慶忌字子真狄道人少以父任所在著名成帝時執  
金吾數年坐小法左遷為雲中太守復徵為光祿勳  
仕至左將軍為國虎臣外國敬其威信卒官

馮立上黨潞人成帝河平三年遷五原太守居職公廉  
甚有治行

馮參立弟為人務嚴初為渭陵令徙為郎永始二年遷  
代郡太守民甚德之

王霸字元伯潁川潁陽人從光武渡河北破王郎建武  
初拜偏將軍九年與吳漢等四將軍五萬餘人擊盧  
芳將賈覽閔堪于高柳遂拜上谷太守領屯兵如故  
捕擊邊寇無拘郡界十年吳漢等四將軍六萬人出  
高柳擊賈覽詔霸與漁陽太守陳訢將兵為諸軍鋒  
左南將軍將數千騎救覽霸等連戰於平城下破之

還入鴈門與驃騎大將軍杜茂會攻盧芳將尹由於  
崞繁峙不克盧芳與南部烏桓連兵寇盜尤數緣邊  
愁苦十三年詔將弛刑徒六千餘人與杜茂治飛狐  
道堆石布土築起亭障自代至平城三百餘里凡大  
小數十百戰識邊事數上書言宜結和親又陳委輸  
可從溫水漕以省陸轉輸之勞事皆施行後南部烏  
桓降服北邊無事霸在上谷二十餘歲三十年定封  
淮陵侯永平二年以病免後數月卒

耿舒況子弇弟更始徵代郡太守趙永況勸永不應召  
令詣光武光武遣永復郡而代令張曙據城拒永招  
迎北部烏桓以為援助光武以舒為復胡將軍使擊  
曙破之後封牟平侯卒

蘇竟字伯況扶風平陵人平帝世以明易為博士講書  
祭酒善圖緯能通百家之言王莽時拜代郡中尉時  
北邊擾亂民多罹禍竟終完輯一郡光武即位就拜  
代郡太守使固塞以拒邊寇建武五年冬盧芳略得

諸郡帝使偏將軍隨弟屯代郡竟病篤以兵屬弟詣  
京師謝罪拜侍中竟潛樂道術作記誨篇及文章傳  
於世年七十卒

廉范字叔度京兆杜陵人趙將廉頗之後也漢興以廉  
氏豪宗自苦陘徙焉曾祖父褒祖丹范舉茂才遷雲  
中太守會寇大入塞烽火日通故事寇過五千人移  
書傍郡吏欲傳檄求救范不聽自率士卒拒之寇眾  
盛而范兵不敵會日暮令軍士各交縛兩炬三頭薰

火營中星列寇遙望火多謂漢兵救至大驚待旦將  
退范乃令軍中蓐食晨往赴之斬首數百級寇自相  
讎藉死者千餘人由此不敢復向雲中後頻厯郡守  
世伏其好義

成嚴為雲中太守建光元年擊其至鞬兵敗力戰歿  
楊穆為雲中太守成嚴功曹建光元年秋其至鞬寇居  
庸嚴擊之兵敗穆以身捍嚴與俱戰歿

李超為代郡太守永建元年鮮卑寇郡超戰死

杜密字周甫潁川陽城人為人沈質少有厲俗志為司徒胡廣所辟稍遷代郡太守累官太僕黨事起免歸與李膺俱坐而名行相次故時人亦稱李杜焉後復為太僕明年坐黨事被徵自殺

晉

辟閭嵩段匹磾署代郡太守劉琨被拘嵩與琨所署雁門太守王據後將軍韓據連謀密作攻具欲襲段匹磾事覺嵩及王據被害



北魏

崔弘清河人初仕燕為高陽太守魏道武破常山弘奔  
海渚道武素聞其名遣吏追獲以為黃門侍郎與張  
袞對掌機要創立法度及道武即帝位命吏部郎鄧  
淵立官制協音律儀曹郎董謐制禮三公郎王德定  
律令太史令龜崇考天象弘時為尚書總裁之以為  
永式又分尚書三十六曹及外署凡置三百六十曹  
令八部大人主之以弘為吏部尚書通署三十六曹

如令僕統事明元帝即位詔弘與長孫嵩安同奚斤等八人坐止車門右共聽時政時人謂之八公是時徵郡縣豪右內徙民戀土不樂寇盜羣起帝引八公議之曰朕欲為民除蠹而守宰不能撫綏使之紛亂今犯者既衆不可盡誅吾欲大赦以安之何如元城侯屈曰不如誅其首惡赦其餘黨弘曰赦雖非正可以行權屈欲先誅後赦曷若一赦而遂定乎赦而不從誅未晚也帝從之既而遣于栗磾討不從命者所

向皆平弘終天部大人封白馬公卒謚文貞

崔浩弘之子研精經術練習制度凡朝廷禮儀軍國書  
詔無不關掌纖妍潔白如美婦人常自謂才比子房  
而稽古過之明元帝嘗召語至夜半賜御醪醕十觚  
水晶鹽一兩曰朕味卿言如此故欲共饗其美神麇  
中進撫軍大將軍浩善占天文嘗置銅鋌酢器中夜  
有所見即以鋌畫紙作字記之帝每如浩家問以災  
異或倉卒不及束帶奉進蔬食帝必為之舉筋或立

嘗而還嘗指浩以示高車渠帥曰此人惟纖懦弱不能彎弓持矛然胸中所懷乃過於甲兵朕之前後有功皆此人所教也又勅尚書曰軍國大計汝曹所不能決者皆當咨浩然後施行北涼使至帝執浩手目之曰汝所聞崔公此則是也才略之美於今無比朕行止咨之豫陳成敗若合符契後以史事被大戮浩既死之後帝北伐會傳北部尚書李孝伯卒帝聞之嘆曰李宣城可惜既而曰朕失言崔司徒可惜李宣

城可哀宣城即孝伯也自浩之誅軍國諫議皆出孝伯寵眷亞於浩

高允渤海人字恭伯仕魏太武為侍郎授太子經太武嘗問允何政為先允曰臣少賤惟知農事若國家廣田積穀公私有備則飢饉不足憂也時魏多封禁良田故允及之太武乃命悉除其禁以賦百姓及與崔浩同修國史浩得罪被收太子召允謂曰吾自尊卿脫至尊有問但依吾語太子入言允小心慎密且制

由崔浩請赦其罪魏主問允曰國書皆浩所為乎對  
曰太祖紀前著作郎所為先帝及今紀臣與浩共為  
之然浩所領事多總裁而已至於著作臣多於浩殿  
下以臣侍講日久欲勾其生耳魏主顧謂太子曰直  
哉此人情所難宜特除其罪以旌之遂赦之太子見  
監國頗營田園收其利允諫曰天地無私故能覆載  
王者無私故能容養願殿下親近忠良斥遠邪佞所  
在田園分給貧下文成之立也允預其謀及陸麗等

皆受賞而不及允允終身不言太安四年遷為中書  
令咸陽公允好直諫事有不便輒求見屏人極言魏  
主甚重之呼為令公而不名時魏百官無祿允嘗使  
諸子樵採自給魏主至其第唯茅屋布被而已魏主  
嘆息賜以粟帛拜其子悅為郡守天安元年允請立  
郡學置博士助教生員從之孝文太和二年以允為  
中書監議定律令詔乘車入殿朝賀不拜允仁恕簡  
靜歷事五帝出入三省五十餘年未嘗有譴年九十

八卒贈司空謚曰文賻祿甚厚魏初以來存亡蒙賚皆莫及也

李安世仕孝文帝為給事中先是民多蔭附皆無官役而豪強徵斂倍於公賦安世上言歲飢民流田業多為豪右所占奪雖桑井難復宜更均量使力業相稱又所爭之田宜限年斷事久難明悉歸今主以絕詐妄帝善之由是始議均田詔諸男夫十五以上受露田四十畝婦人二十畝奴婢依良丁牛一頭受田三



十畝限至四牛所授之田率倍之三易之田再倍之  
以供耕作及還受之盈縮人年及課則受田老免及  
身沒則還田奴婢牛隨有無以還之初受田者男夫  
給二十畝課種桑五十株桑田皆為世業終身不還  
恒計現口有餘者無受無還不足者受種如法盈者  
得賣其盈諸宰民之官名隨近給公田有差更代相  
付賣者坐如律

高祐仕孝文帝為秘書令帝問祐曰何以止盜對曰昔

宋均立德猛虎渡河卓茂行化蝗不入境況盜賊人也苟守宰得人治化有方止之易矣又言今之選舉不採識治之優劣專簡年勞之多少非所以盡人才也若停薄藝棄朽勞唯才是舉則官方穆矣又勳舊之臣才非撫民者可加以爵賞不宜委以方任所以王者可私人以財不可私人以官者也帝善之祐出鎮滑臺命縣立學校黨立小學

來大千代人累遷征北大將軍賜爵廬陵公鎮雲中兼

統白道軍事寇賊北叛大千前後追擊莫不平殄世祖以其壯勇數有戰功兼悉北境險要詔巡撫六鎮以防寇虜經略布置甚得事宜後吐京反以大千為都將討平之在吐京卒喪還停於平城南世祖出還見而問之左右以對世祖悼嘆者良久詔曰大千忠勇盡節功在可嘉今聽喪入殯城內謚莊

司馬楚之字德秀晉宣帝弟太常馯之八世孫父榮期晉梁益二州刺史宋高祖兄司馬戚屬楚之亡匿諸

沙門中濟江自歷陽西入義陽竟陵蠻中轉側汝潁之間收衆據長社歸之者常萬餘人太宗末遣使請降世祖初徵入朝封瑯琊王車駕伐蠕蠕詔與濟陰公盧中山等督運以繼大軍時鎮北將軍封杏亡入蠕蠕說令擊楚之等以絕糧運蠕蠕乃遣奸覘入楚之軍截驢耳而去有告失驢耳者諸將莫能察楚之曰必是覘賊截之以為驗耳賊將至矣即使軍人伐柳為城水灌之令凍城立而賊至冰峻城固不可攻

逼賊乃走散世祖聞而嘉之尋拜假節侍中鎮西大將軍開府儀同三司雲中鎮大將朔州刺史在邊二十餘年以清儉著聞和平五年薨年七十五高宗悼惜之謚貞王陪葬金陵

司馬躍字寶龍楚之次子尚趙郡公主代兄金龍為雲中鎮將朔州刺史假安北將軍河內公躍請罷河西苑封與民墾殖有司執奏此麋鹿所聚大官取給今若與民至於奉獻時禽懼有所闕詔曰此地若任稼

檣雖有獸利事須廢封若是山澗虞禁何損尋先朝  
置此豈苟藉斯禽諒亦以俟軍行薪蒸之用其更論  
之躍固請以與民高祖從之太和十九年卒楚之父  
子相繼鎮雲中朔土服其威德

元順字子和任城王澄長子九歲師事樂安陳豐初書  
王羲之小學篇數千言晝夜誦之旬有五日一皆通  
徹豐奇之曰江夏黃童不得無雙也年十六通杜氏  
春秋篤志好古性褻謬淡於榮利累除給事黃門侍

郎時領軍元義威勢尤盛順鯁言正議曾不阿旨繇  
此見憚出除平北將軍恒州刺史順謂義曰北鎮紛  
紜方為國梗桑乾舊都根本所繫請假都督為國捍  
屏義心疑難不欲授以兵官謂順曰此朝廷之事非  
我所裁順曰叔父既握國柄殺生由已自言天之厯  
數應在我躬何得復有朝廷也義彌忿憚之尋轉齊  
州刺史後除吏部尚書兼僕射河陰之難為陵戶鮮  
于康弼所害家徒四壁無以殮止有書數千卷而已

謚文烈子朗年十七手刃康努以首祭順墓

李崇孝武時為尚書令貴戚重望器識英敏沃野鎮民破六韓拔陵反加北討大都督命將軍崔暹廣安王深皆受節度敗於白道索引還雲中謂諸將曰雲中者白道之衝賊之咽喉若此地不全則并肆危矣乃請費穆為朔州刺史以鎮之先是崇擊柔然阿那瓌於平城長史魏蘭根說崇曰昔緣邊諸鎮地廣人稀或徵發中原強宗子弟或國之肺腑寄以爪牙中年



以來有司號為府尹役同廝養理當憤怨宜改鎮立  
州分置郡縣凡是府尹悉免為民入仕次叙一準其  
舊文武兼用威恩並施此計若行國家庶免北顧之  
憂崇奏之不報至是深復上言曰先朝都平城以北  
邊為重盛簡親賢擁麾作鎮配以高門子弟非為不  
廢仕宦乃更獨得復除當時人物忻慕為之太和中  
李冲用事涼州士人悉免廝役帝鄉舊人仍防邊戍  
本鎮驅使遂隔清途自非得道皆與為伍又峻邊兵

之格鎮人不聽浮遊在外於是少者不得從師長者  
不得遊宦獨為匪人言之流涕自定伊洛邊任益輕  
唯滯底凡材乃出為鎮將轉相模習專尚聚斂或諸  
方奸吏犯罪配邊為之指蹤政以賄立邊人無不切  
齒李崇請改鎮為州抑亦先覺朝廷未許而拔陵為  
亂此段之舉指望銷乎而崔暹隻輪不返將士之情  
莫不解體恐諸鎮尋亦如此天下之事何易可量亦  
不省及東西部敕勒皆叛附拔陵始思李崇之言詔

諸州鎮軍實非有罪配隸者皆免為民改鎮為州遂  
破拔陵

費穆字朗興代人于之孫也襲男爵六鎮反叛詔穆為  
別將隸都督李崇北伐都督崔暹失利崇將班師會  
諸將議曰朔州是白道之衝賊之咽喉若此處不全  
則并肆危矣今欲選諸將一人留以鎮捍不知誰堪  
此任僉曰無過穆者崇乃請為朔州刺史仍輔國將  
軍尋改除雲州刺史穆招離聚散頗得人心時北境

州鎮悉皆淪沒惟穆獨據一城四面抗拒孝昌中二絳蜀反以穆為都督討平之後晉封趙平郡開國公元顥以河陰酷濫事起於穆詰而殺焉莊帝謚武宣北周

于翼字文若謹子尚平原公主大象初拜大司徒詔巡長城立亭郵西自雁門東至碣石創新改舊咸得其要害晉上柱國卒贈蒲州刺史謚穆

隋

長孫晟字季晟河南洛陽人屢使突厥以功累授左勳  
衛驃騎將軍開皇十九年染干來降遣晟領五萬人  
於朔州築大利城以處之晟又奏染干部落歸者既  
衆雖在長城之內猶被雍閭抄略往來辛苦不得寧  
居請徙五原以河為固於夏勝兩州之間東西至河  
南北四百里掘為橫塹令處其內任情放牧免於抄  
略人必自安上並從之明年復還大利城安撫新附  
終右驍衛將軍唐貞觀中追贈司空上柱國齊國公

謚曰獻

杜彥雲中人周累封襄武縣侯隨開皇初進爵公累轉雲州總管十八年拜朔州總管果強自任騎射惟精績樹平陳威昭禦寇突厥寇雲州復拜雲州總管

賀婁子幹字萬壽本代人世居關右周時封武川縣公隋晉鉅鹿郡公開皇中拜雲州刺史甚為寇所憚後數年突厥雍虞閭遣使請降并獻羊馬詔為行軍總管出西北道應接之還拜雲州總管以突厥所獻馬

百匹羊千口賜之下書曰自公守北門風塵不警突厥所獻還以賜公母憂去職卒謚懷

唐

李靖本名藥師雍州三原人姿貌瓌偉有文武材略大業末累除馬邑郡丞義兵將起靖自鎖上變至長安道塞而止高祖克長安執靖將斬之靖大呼曰公起義兵本為天下除亂乃以私怨斬壯士乎高祖壯其言秦王又固請捨之尋入秦王幕府從趙郡王孝恭

破開州蠻冉肇則上手敕曰既往不咎向事吾久已  
忘之遂平東南地亘萬里武德八年突厥寇太原以  
靖為行軍總管與張瑾屯太谷時諸軍不利獨靖以  
完軍歸貞觀初以刑部尚書檢校中書令三年轉兵  
部尚書為代州道行軍總管率驍騎三千自馬邑直  
趨惡陽嶺以逼突厥四年進擊定襄破之獲隋齊王  
子楊正道及隋蕭后送于京師可汗脫身遁磧口以  
功進封代國公又以靖為定襄道行軍總管引兵襲



頡利牙帳殺其妻義成公主擒頡利以獻斥地自陰  
山北至大漠上因大赦天下賜民五日酺拜尚書右  
僕射九年破吐谷渾改封衛國公十三年卒冊贈司  
徒并州大都督謚曰景武靖為唐勳臣第一高祖嘗  
曰使功不如使過果然

婁師德原武人天授初檢校豐州都督儉約率下衣皮  
袴每患軍輸不給乃悉屯田積穀百萬兵用饒足無  
轉餉和糴之費

盧簡方盧鈞鎮太原表節度府判官會党項羌擾鈞使  
簡方督兵夾邊旁河相險集樹堞障自神山至鹿泉  
綿三百里扈遏其衝賊不得騁候邏使之累拜大同  
軍防禦使大開屯田練兵侈關沙陀畏附擢義昌節  
度使入拜大僕卿領大同節度久之徙振武軍卒

後晉

吳巒字寶川鄆州盧縣人清泰中為大同節度判官遼  
師過雲州節度使沙彥珣出城迎謁為遼所執城中

推轡主州事巒即閉門拒守遼以兵圍之晉高祖立  
以雲州入於遼而巒猶守城不下遼師圍之凡七月  
高祖義巒所為乃以書告遼使解兵去而召巒為武  
寧軍節度副使後殉城於貝州

宋

楊業善戰號無敵雍熙三年副潘美為雲應軍行營都  
部署遼人復取寰州業力戰重傷為遼所獲不食三  
日死

田重進幽州人太平興國四年從征太原還錄功擢天  
德軍節度使雍熙中北征率兵傅飛狐城下伏兵飛  
狐南口擒遼驍將大鵬翼及監軍馬贊副將何萬通  
并渤海軍三十餘人斬數千級俘獲萬計遂北四十  
里連下飛狐靈邱等城進攻蔚州其牙校李存璋等  
殺蕭卓琳執耿紹忠率吏民來附會曹彬師不利乃  
還卒贈侍中

呂誨開封人仁宗朝進士熙寧初任大同兼交城令權

鹽不廢而民安詳史入名宦

遼

耶律學古字伊遜是裕悅洼之庶孫好學工詩乾亨二年為彰國軍節度使時南境未靜民思休息乃禁寇掠以安之會宋將潘美率兵分道來侵學古以軍少虛張旗幟雜丁黃為疑兵是夜適獨虎峪舉烽火遣人偵視見敵俘掠村野擊之悉獲所掠物擒其將領自是學古與潘美各守邊約無侵軼民獲安業以功

為特哩衮卒

邢抱樸應州人好學博古統和四年山西州縣被兵命抱樸鎮撫之民始安後為南院樞密使卒

張儉宛平人性端慤不事外飾統和十四年舉進士第一調雲州幕官故事車駕經行長吏當有所獻聖宗獵雲中節度使進曰臣境無他產惟幕僚張儉一代之寶願以為獻先是上夢四人侍側賜食人二口至聞儉名始悟召見容止樸野訪及世務口奏三十餘

事由此顧遇特異踐歷清華號稱明幹太平中為大同軍節度使後仕至太師加尚父封陳王卒

耶律薩喇性忠直沉厚清寧初累遷西南面招討使以治稱後為耶律伊遜黨誣首被害

蕭賴克薩圖魯布部人性沉毅清寧中為彰國軍節度使咸雍十年以北院樞密副使經略西南邊撤宋堡障戍以皮室軍上嘉之後為耶律伊遜黨誣告被害與薩喇胥繪像宜福殿

耶律博迪系出季父房咸雍八年為彰國軍節度使道  
宗獵達魯噶山博迪謁於行宮帝問邊事對曰自應  
州南境至天池皆我耕牧之地清寧間邊將不謹為  
宋所侵烽堠內移似非所宜道宗然之拜北面林牙  
後遣人使宋得其侵地命博迪往定疆界累遷北院  
樞密使卒

金

劉樞字居中通州三河人刻意經史登天眷二年進士



為飛狐令蔚州刺史恃功貪汙無所顧忌屬邑皆厭  
苦之樞一無所應乃撫以他事繫獄將致之死郡人  
有憐樞者導樞脫走訴於朝會廉察使至守倅而下  
皆抵罪廢獨樞治狀入優等躡遷奉直大夫仕至中  
都路轉運使卒

劉仲洙字師魯順天宛平人大定三年登進士第歷龍  
門主簿章宗即位除西京路提刑副使先是田穀等  
以黨罪廢錮者三十餘家仲洙知其冤上書力辨帝

從之乃復穀官爵而黨禁遂解明昌二年授并王傅  
兼知大同府事尋改平陽後為定海軍節度使時仲  
洙兄仲淵以罪謫石州仲洙請以萊易石朝廷義而  
不許致仕卒仲洙果於從政所在有功績號能吏

劉仲誠宛平人明昌間知大同府誠信剛直治多善政  
稱良吏云

完顏守貞希尹孫襲祖穆昆大定二十五年為西京警  
巡使世宗愛其剛直授中都左警巡使遷同知西京

留守事御史臺奏守貞治有善狀世宗因謂侍臣曰  
守貞勲臣子又有材能全勝其兄守道他日可用也  
明昌初拜參知政事進尚書左丞改西京留守四年  
召拜平章政事封蕭國公承安元年降授河中防禦  
使卒謚肅守貞剛直明亮臧否無少隱故為胥持國  
輩所忌竟以直罷後趙秉文上書言君子故相完顏  
守貞小人今參知政事胥持國也

伊喇呼喇大定二十六年為彰國軍節度使應州寺僧

與判大宗正事曹王永功有舊將訴事於呼喇求永  
功手書為地呼喇得書奏之上謂宰臣曰永功以書  
囑事呼喇此雖細微不可不懲凡人小過不懲遂至  
大咎有犯必懲庶幾能改是亦教也皆曰今用法無  
私臣下敢不敬畏於是永功解職

完顏阿錫克宗室子好學問襲北京路筈栢山明安聽訟  
明決人信而愛之察廉能除彰國軍節度副使及改  
上京留守判官提刑司奏彰國軍治狀遷同知率賓

路節度事仕至河南統軍使卒

烏凌阿暉明德后兄除富僧格羣牧使謹畜牧不事遊宴孽產蕃息進秩改特默羣牧使大定時遷都點檢卒

元

劉伯林濟南人好任俠善騎射金末為威寧防城千戶壬申太祖圍威寧伯林以城降即以金都提控原職授之命選士卒為一軍招降山後諸州太祖北還留

伯林屯天成遇金兵前後數十戰進攻西京錄功賜  
金虎符充西京留守兼兵馬副元帥戊寅從攻下太  
原平陽己卯破潞絳及火山聞喜諸州縣時欲徙聞  
喜民實天成伯林以北地人艱食力爭止之部曲俘  
獲萬計悉縱之在威寧十餘年務農積穀與民休息  
隣境凋瘵而威寧獨為樂土語人曰吾聞活千人者  
後必封吾所活何啻萬餘人子孫必有興者辛巳以  
疾卒累贈太師封秦國公謚忠順

蘓克齊喇氏使金不辱命賜護駕士五人昔使過崞州  
崞人盜殺其良馬兼以崞民賜之乙未為山西大達  
魯噶齊回回六人將誅力言其可恕至雲中皆釋之  
後有至大官者其寬大愛人多類此卒封宣寧王謚  
忠襄

張思明字士瞻家輝州皇慶五年除西京宣慰使嶺北  
戍士多貧歲凶相挺為變思明恩威並行邊境乃安  
王居禮字子敬泰定間知應州修學開渠著有善績

韓浩宜都元帥兼應州彰國軍節度使善附循士卒一  
軍傾心又愛護百姓性持正人不敢干以私至今土  
人猶知有韓元帥云

崔敬字伯恭惠州人至元六年僉山北廉訪司事按部  
宣寧有李秀坐造偽鈔連數千人皆與秀不相識敬  
疑而讞之秀曰吾以訓童子為業捶楚之下不敢不  
誣服耳敬詢知始謀者乃大同王濁十餘年事不泄  
而有司誤以李秀為王濁也移文至大同果得王濁



為真造偽鈔者人皆傳頌之

孫德謙河南睢州人任中書省歷大同行省平章事明  
兵既克大都元主已北行徐達遣將圍大同德謙嬰  
城固守自知力不能支乃手書自決作詩數章詞義  
激烈城陷不屈死

明

章存道龍泉人御史中丞溢之子也溢集義兵存道撫  
其衆遂成練卒授處州衛指揮副使洪武三年守平

陽轉左衛指揮同知已從湯和北伐守哈墩不刺營  
五年從和征陽和遇敵於斷頭山力戰死之

譚廣字仲宏丹徒人領神機營馬獨肥時號譚家馬從  
征迤北充驍騎將軍十一年練軍山西十二年從征  
九龍口為前鋒賊數萬憑崖廣以神箭萬人射之死  
者無算乘勝夾擊賊大敗論功晉都督僉事後鎮宣  
府二十年稱名將封永寧伯卒謚襄毅

鄭允先天台人洪武間任渾源州仁愛有學公暇即詣

學與諸生講論經史歲餘問閤充足俗尚醇厚士風興起立祠祀之

陳立誠洪武間知應州創建悉出經畫諸務皆由措置改築城池移修廟學規模弘遠永為依賴

張文煥洪武間任白祥鎮巡檢忠勇有清操敵騎逼邊文煥率弓兵二百人奮勇徑進中流矢歿妻聞之亦自縊以殉遺子一貧不能自活召至京師以父俸給之

王達善江南無錫人洪武間任大同府訓導學問淵博  
氣度和雅馭諸生恩義兼至稱經人兩師嘗著天游  
小藁梅花百咏後累官翰林學士

陳質建文初以參將守大同中軍都督同知助宋忠保  
懷來忠敗退守大同代王欲舉兵應燕質持之不得  
發燕師攻大同堅守不下蔚州廣昌附於燕旋復取  
之永樂初被害

王士嘉字道亨武城人建文中繇國子生除大同山陰

知縣善決疑獄有齎錢百緡卧樹下失之者士嘉曰  
此樹為祟吾將治之趨駕出士民傾城往視偵不往  
者果得盜代王內藏失物戶局如故士嘉曰此必狙  
公教狙竊之乃陳幣於庭呼羣狙過伺而觀之果有  
狙攫去詰其主皆服人以為神後為禮部右侍郎致  
仕卒

鄭亨合肥人嗣大興左衛副千戶靖難兵起從破紫荊  
關掠廣昌取蔚州直抵大同封武安侯仁宗初拜征

西前將軍鎮大同墾田積穀邊備繕完自是大同希寇患宣德間再鎮大同轉餉宣府招降酋長四十九人請于朝厚撫之歸附者相屬九年卒亨嚴肅重厚善撫士恥掎克大同鎮守中官撓軍政據理裁正其人不悅然其卒也深悼惜之贈漳國公謚忠毅

王良永樂間以戶部主事來督大同軍餉甚有威信大為邊士所服

周郁濟南人永樂間知渾源州時旱蝗郁齋沐虔禱蝗

飛出境川南有虎傷人郁牒于神是夜虎果入籠中  
後陞荊州知府所在民有餘思

羅亨信字用實東莞人永樂二年進士宣德中為御史  
清軍山西有聲有薦其堪方面者命食按察僉事俸  
待遷正德中以右僉都御史巡撫宣府大同汰諸衛  
冗官老弱者四百八十餘人參將石亨請簡大同民  
三之一為軍亨信奏止之晉右副都御史巡撫如故  
時遣官度二鎮軍田一軍八十畝外悉徵稅五升亨

信言永樂時詔邊軍盡力墾田毋徵稅陛下復申命之今奈何忽為此舉塞北諸軍防邊勞苦無他生業惟事田作每歲自冬徂春迎送瓦剌使臣三月始得就田七月又復刈草八月以後修治關梁計一歲中曾無休暇況邊地磽瘠霜早收薄若一收稅則民不復耕必致竄逸上納其言景帝初晉左副都御史致仕卒

周安鳳陽人襲振武衛指揮僉事宣德間從征交趾奮



勇深入殺賊數十人賊益衆圍之格鬪死于陣弟讓等十二人俱戰死事聞憫其忠遣進士王奎諭祭

李儀涿州人以薦舉進英宗初始設諸邊巡撫僉都御史丁璿方督大同宣府軍儲而儀以右僉都御史巡撫其地盛有所建置號令一新時欲遣方政楊洪襲迤北諸部儀乞勅政等無窮追不納督糧參政劉璉不職儀劾之璉亦誣儀適參將石亨欲奏鎮守中官郭敬罪先咨儀儀誤緘咨牒于核餉主事文卷中戶

部以聞亨敬遂相訐命儀璉自陳而切責敬等璉止  
停俸二歲儀雖引罪自負其直詞頗激被劾下吏笞  
死儀居官廉謹邊人素德之建昭德祠以祀璿上元  
人永樂中進士繇御史擢居是職後為副都御史卒  
所至有政聲

魏源字文淵建昌縣人永樂四年進士累遷刑部尚書  
正統二年命往大同宣府督察諸將便宜從事源按  
行天城朔州諸險要令將吏分守免屯軍租一年儲

大器為邊備諸依權貴避役者悉括歸伍邊務脩飭  
後致仕卒

陳懷合肥人襲父職正定副千戶永樂中晉都指揮使  
涖山西都司事正統二年以左都督鎮大同時漠北  
人進貢者日給廩餼為軍民害言于朝得減省後封  
平鄉伯死于土木贈侯謚忠毅

盧睿字仲思婺之東陽人永樂辛丑進士為御史廉正  
明決正統丁巳陞右僉都御史巡撫宣大嚴法令刻

蠹弊節費廣儲權強撫弱時北部入貢勢頗張慮其  
包藏禍心上疏言馭遠之道在恩威相濟辛酉改命  
參贊寧夏軍務以疾歸性孝友廉介見義勇為家無  
餘資而貧困者多賴之

李福真寧人由監生任大同同知英宗北狩時福冒險  
進貢久無怠志回鑾日陞本府知府進陞參政仍管  
府事

李隆字彥平和州人襲父濬襄城伯雄偉有將略讀書

好文論事侃侃正統十一年巡邊大同賜寶刀一申  
飭戒備內外凜凜訖還不戮一人明年卒

郭登字元登武定侯英孫好談兵工詩明武將無及者  
正統十四年車駕北征扈從至大同拜都督僉事充  
參將佐總兵官劉安鎮守及旋師登告學士曹鼐等  
駕宜入紫荆關王振不從遂及於敗時大同軍壘蕭  
條城門盡閉人心沟沟登慷慨奮勵修城堞繕兵械  
撫循士卒弔死問傷親為裹創傳藥曰吾誓與此城

共存亡矣也先擁駕至閉門不納英宗遣人謂登曰  
朕與登有姻何拒朕若是登奏曰臣奉命守城不知  
其他景帝初晉都督同知克副總兵尋代安為總兵  
官也先入將所部入援先馳蠟書奏奏至敵已退上  
褒荅之晉右都督却敵城下上用兵方略十餘事景  
泰元年春敗敵於沙窩以八百騎破數千人封定襄  
伯四月又敗寇於土城六月再却寇鎮守中官陳公  
與登構上遣人代公還登愈感奮及英宗還代王頌

登功云有自敵中來者言其初計欲取大同為巢穴  
故數來攻及每至輒敗有一營數十人不還者敵氣  
懾遂奉駕還乞降勅獎勞兵部言登已封伯乃止二  
年以老疾乞休舉石彪自代不許時沈固在大同久  
事多廢登劾奏之而薦尚書楊寧布政使年富又言  
大同既有御史又有巡按御史僉都御史任寧宜止  
巡撫宣府上悉從之遂以富代固而徹固及寧還總  
兵孫鏜與登互訐詔切責鏜已勅登與鏜兩戒之秋

以疾召還成化中提督十二團營卒贈侯謚忠武登  
為將兼智勇紀律嚴明料敵制勝動合機宜詳武事  
黃彪平樂人正統間以舉人知應州賑濟有方催徵不  
擾祀名宦

霍瑄字廷璧鳳翔人繇鄉舉入國學授大同通判用薦  
就擢知府也先擁英宗至城下瑄與理餉侍郎沈固  
等出謁奉命括金帛充犒固悉所有獻之已而復至  
郭登戒嚴弗應瑄號泣從水竇匍匐出叩馬鳴咽衆



露刃叱之不為動因獻英宗服物出金帛犒軍英宗  
嘉歎密諭瑄與登堅守瑄還也先數出沒大同渾源  
伺軍民樵采脫歸者率傷殘瑄具為奏老弱聽暫徙  
發粟賑而所留城守丁壯除賦役秩滿當遷鎮巡諸  
臣乞留詔加山西右參政仍治府事英宗復位德瑄  
及固徵拜瑄工部右侍郎而固亦以石亨薦起為戶  
部尚書既而巡撫上瑄治行賜誥旌異瑄在大同時  
巡撫年富被逮瑄資其家還里為鎮守太監韋力轉

所惡撻之十餘瑄至是以間且言力轉每宴輒用妓樂服御僭侈強取部民女為妾力轉被逮許瑄上兩釋之瑄後致仕卒

許貴字用和江都人襲父成永新伯以武進伯朱寯薦為山西行都司督操大同諸衛士馬久之守備大同西路也先入從石亨戰陽和渡口敗績貴力戰得還時貴當敵衝人心尤洵懼激戰士以忠義敵來擊敗之晉都指揮使景泰元年春克石參將敵寇威遠追

敗之蒲州營奪還所略人畜敵萬騎逼城下禦却之  
再遷都督同知大同之馬命求民間得八百餘匹所  
司不給直貴為請乃予之嘗募死士入敵壘劫馬百  
餘悉畀戰士皆樂為用分守中官韋力轉淫虐眾莫  
敢言貴獨劾奏三年還京天順五年卒

年富字大有懷遠人本姓嚴後訛為年以會試副榜注  
銓景泰二年為右副都御史巡撫大同提督軍務時  
經喪敗法度廢弛叢弊尤甚富一意拊循奏免秋賦

罷諸州縣稅課局停太原民之轉餉大同者武清侯  
石亨武安侯鄭宏武進伯朱瑛令家人領官庫銀帛  
糴米實邊多所乾沒富首請按治詔宥亨等抵家人  
罪亨慮久雨壞關城潛遣卒十餘人行視卒遂越關  
抵大同富復劾亨專擅亨輸罪已削襄垣王府菜戶  
又杖其厨役之署教授事者已又劾分守中官韋力  
轉參將石彪及山西參政林厚罪豪家愈側目相與  
撫富罪巡按御史白其誣遂不問當是時富威名重

天下而當事大臣于謙等力保持之故得行其志母  
憂詔乘傳奔喪起復視事七年富上言往時諸邊雖  
設鎮守監鎗內官其數猶少自土木變後諸邊悉增  
如陽和天城諸處一城二人擾民殊甚今邊務稍寧  
請減汰格不行又言洪武定制軍官私罪收贖惟笞  
則然杖卽降授徒流俱充軍律明甚今屢變更犯贓  
者輕皆復職重惟立功刑不足懲更無顧憚此皆法  
官過也於是廷議流徒輸贖如故惟于本衛差操不

得復領軍矣英國公張懋及鄭宏各置田莊于邊境  
歲役軍耕種富劾之還軍于伍天順元年革巡撫官  
富亦罷歸頃之石彪以前憾誣劾富逮下詔獄李賢  
稱富能祛弊上曰此必彪為富抑不得遂其私耳已  
而事果無驗令致仕後召任戶部尚書卒謚恭定  
胡貞扶風人先知水和景泰間擢應州買牛給耕雪冤  
除獄政聲益茂祀名宦

章綸桐城人景泰中以給事中謫應州判擢本州洞達

治理案無留牘敏練仁恕有功地方歷官參政

李秉字執中曹縣人正統元年進士天順中復設巡撫大臣薦秉才以右僉都御史撫大同都指揮孫英先以罪貶秩還衛總兵李文妾行詔令復職秉至即斥之裨將徐旺領騎卒操練秉以旺不勝任解其官怨謗紛起會天城守備中官陳例久病秉請易以羅付責專擅徵下詔獄指揮門達訊之斥為民憲府時起左都御史成化二年秋命自遼東抵大同整飭邊備

更將帥申軍令而還未幾命為總督數破敵勞以羊酒賜麒麟服加太子少保入為吏部尚書致仕卒贈太子太保謚襄敏

王宇字仲宏祥符人童壯時日記萬言巡撫于謙奇之登正統四年進士天順二年為右副都御史巡撫宣府命兼撫大同石亨及從子彪驕恣大同其舊鎮地徵索尤橫宇抗疏論其奸乞置之法疏雖不行聞者敬憚督餉郎中楊益不能備芻蕘為宇所劾戶部庇



之字並劾尚書沈固等皆輸罪晉大理卿卒

王越字世昌濟縣人善射有大略登景泰二年進士天  
順七年大同巡撫韓雍召還上難其代喟然曰安得  
如雍者而任之李賢因薦越召入見上喜其岸異即  
擢右副都御史以行甫至遭母憂奪情視事越乃繕  
器甲簡卒伍修堡砦為經久計成化三年寇入塞督  
將士禦却之秋兼巡撫宣府五年冬寇入河套延綏  
巡撫王銳請濟師詔越帥師赴之破寇六年正月還

尋復援延綏晉左副都御史又晉右都御史七年越以方西征辭大同巡撫詔聽之十六年出師援榆林越提督軍務與太監汪直將輕騎循塞垣而西至大同聞敵帳在威寧海子乃盡選宣大兩鎮兵二萬出孤店潛行至貓兒莊分數道值大風雨雪晦暝進至威寧寇猶未覺掩擊大破之斬首四百三十餘級獲馬駝牛羊六千封威寧伯十七年復與直帥師出大同適寇入掠追擊至黑石崖擒斬百二十餘人獲馬

七百匹晉太子太傅五月大同總兵官孫鉞卒即命  
越代之而以直總鎮宣大後加少保兼太子太傅卒  
贈太傅謚襄敏

賈節城武舉人天順間知應州存心寬恕為政慈祥人  
皆悅服祀名宦

鄭寧字志道祥符人正統間進士由主事累官四川右  
布政擢太僕寺卿成化間遷左僉都御史巡撫宣府  
時盛暑築城堡工役數千人天久旱有司祈禱莫應

寧曰此勞民弗息之徵也乃下令罷役是夕天大雨  
稿事有秋邊人皆悅以內艱歸遣官諭祭奪情起復  
供職固請終制不允再至鎮軍民咸迎拜喜曰我公  
來矣逾年移大同寧在邊七年疆場無事延見境內  
士大夫咨詢民瘼次第舉行以疾致仕三上始得請  
其歸也囊無餘貲閒居十四年服食淡泊數至匱乏  
詔有司歲給米四十石弘治間卒

陳壽字本仁其先淦人籍寧遠衛成化八年進士授

戶科給事中視宣大邊防劾去鎮守中官不檢者仕  
至刑部尚書致仕卒

余子俊字士英青神人景泰二年進士成化二十年以  
戶部尚書太子太保兼左副都御史總督大同宣府  
軍務冬還朝二十一年復出行邊先是子俊巡撫延  
綏東起清水營西抵花馬池延袤千七百七十里咸  
鑿崖築牆掘塹其下連續不絕每二三里置敵臺崖  
砦為巡警之所又於崖砦空處築短牆橫一斜二如

箕狀以瞭敵避射凡築城堡十一邊墩十五小墩七十八崖砦八百十九役軍四萬人不三月而城牆內地悉分屯墾及巡歷宣大請以延綏邊牆法行之宣大因歲歉而止比復出銳欲行之言東起四海治西抵黃河延袤千三百餘里舊有墩百七十應增築四百四十墩高廣皆三丈計役夫八萬六千數月可成詔明年四月即工而歲比不登上下難之予俊又欲責成於邊臣而已不親其事謗議遂起至冬疏請還

改左都御史巡撫大同中官韋敬讒子俊假修邊多  
侵耗命工部侍郎杜謙勘之敬又核子俊私恩怨易  
將帥下兵部覈侍郎阮勤等為白命謙并按問而中  
朝多欲傾子俊子俊危甚謙還奏易置將帥如勤等  
言所費無私然為銀百五十萬米穀二百三十萬二  
十二年二月遂落太子太保致仕去二十三年上悟  
子俊無罪而修邊功不可泯復召為兵部尚書弘治  
二年卒贈太保謚肅敏子俊嘗曰大臣謀國當身任

利害豈得遠怨市恩為自全計其所修邊垣迄為數  
世利云

李敏字公勉襄城人景泰五年進士成化時歷山西右  
布政使累擢右副都御史巡撫大同敵騎出沒塞下  
掩殺墩軍敏伏壯士突擒之修治垣塹敵不敢犯大  
同居極邊孔廟無雅樂敏上奏獲頒賜焉居三年召  
為兵部右侍郎累遷戶部尚書先是敏在大同見山  
東河南轉餉至者道遠耗費乃會計歲支外悉令輸



銀民輕齎易達而將士得以其贏治軍裝交便之至是并請畿輔山西陝西州縣歲輸糧各邊者每糧一石徵銀一兩以十九輸邊依時值折軍餉有餘則召糴以備軍興上從之自是北方之稅皆折銀繇敏始也弘治四年歸卒贈太子少保謚恭靖

孫洪字伯大山東昌邑人景泰間進士授兵部主事成化間歷陞河南參政左右布政使遷右副都御史巡撫大同以威寧海子之捷進左副都御史食正二品

俸尋巡撫河南後為周府儀賓劉宣所訐致仕去蓋  
王府怨之實非其罪

胡汝礪寧夏人成化中進士累官知大同府鎮守中官  
不檢下繩之急中官怒汝礪即移疾求去吏部惜其  
才固留之繇是益發舒敢任事官至兵部尚書卒

孫博字約之景州人成化中北部犯大同太監汪直與  
都御史王越保國公朱永將團營軍北伐博以紀功  
從先是博為給事嘗疏論直直恚甚至是請以為從

或危之博曰諫吾職也死生榮辱吾命也將安避乎  
既抵大同每出戰輒令隨營博意氣峭拔兜鍪繡襖  
馳突萬衆間如健將間聚議機宜益侃侃雄辯久之  
直亦敬服師還論功遷山西按察使僉事致仕歸復  
疏論本州知州馬某貪虐狀為所毒馬尋伏誅

丘璐字仲玉蘭陽人陵子成化壬辰進士由給事中累  
遷至山西布政司左參政分守大同沉靜博學建白  
施設多中民隱病卒於官家無餘貲歸無室處人以

是高之

蕭智寶雖舉人成化間知應州才稱果斷政尚清明文  
土地民畏如神厚學校士服其訓祀名宦

張文質扶風人成化間以舉人知渾源州時有妖狼為  
祟牒城隍攝狼至磔于南墀之右歲旱禱雨立應他  
邑歲歉渾源獨稔調知澤州民思之為立碑

汪昱延慶州人成化間以舉人知應州持身清素居官  
公恕民安事安吏畏聲絕祀名宦

于璧新城人成化間以舉人任渾源州學正學富才優  
教嚴品肅集諸生號舍朝夕啓迪人才極一時之盛  
徵拜御史

陳梁涇陽人成化中以舉人任渾源知州地有恒山素  
禁樵採梁奏弛禁民獲利南人克大同軍役不服水  
土多死者梁上其狀遂各調本土衛所軍民圖像祀  
焉陞懃州同知

蔣琬江都人定西侯孫嗣侯成化中督十二團營兼

總神機營上言大同宣府諸塞下腴田無慮數十萬  
悉為豪右所占請遣給事御史按覈定其科額時不  
盡行十三年帥京軍防秋大同宣府陳機宜十餘事  
皆報可累加太保卒謚毅敏

劉廩字廷玉遷安人襲開平衛指揮使習兵書善騎射  
充右參將分守陽和勅部兵三千訓練聽調成化十  
六年從王越征威寧海子晉都指揮使十八年戰黑  
石崖有功晉署都督僉事遷大同副總兵十九年秋

亦思馬因入璽守懷仁聞總兵官許寧失利亟還兵  
援大呼陷陣與子鵬力戰圍乃解以功予實授尋以  
右副總兵分守代州兼督偏頭諸關請易鎮守總兵  
銜上曲從之弘治中佩征西將軍印卒連呼殺賊而  
瞑

劉寧字世安山陽人襲永寧衛指揮使成化十八年為  
左參將分守陽和成化十九年秋亦思馬因圍大同  
總兵官許寧於夏米莊寧援兵至敵乃退無何復入

掠寧將兵三千連敗之聚落站白登柳林小鵝鴿峪  
時諸將多失利許寧以下獲罪寧超薦都督同知改  
左副總兵協守大同與偏頭關總兵周瑄並著功北  
邊稱名將時入貢數萬人懷異志寧率二十騎直抵  
其營衆駭愕有部長勒馬引弓出寧前下馬與諸部  
長坐舉策指畫宣威德一人語不遜寧捫其面奮臂  
起其長叱之退寧復坐與語呼酒勸飲皆感悟卒如  
約弘治十三年大同告警命為副總兵從平江伯陳



銳禦之銳無將略與寧不協止毋戰坐俸半俸間住  
尋還全俸卒贈廣昌伯

謝綬字朝章朝城人成化甲辰進士授任邱令歷陞都  
察院右僉都御史巡撫大同時也先旃廬百餘里蓐  
聚塞下數入侵盜綬至鎮簡練軍實墾田殖穀威名  
流聞部落遠徙不敢近塞又設伏險阨寇騎零抄出  
入輒要擊之日對將吏商軍務方略夜治文書按圖  
籍指畫山川險易及寇中曲折皆如身履好撫卹士

卒調給芻糧燕獠無不周至屢奉璽書褒美以勞成疾卒於軍府訃聞詔守臣臨祭如法

歐信字亨先薊州人成化甲辰進士修幹美儀邊幅整峻以郎中督餉大同增置東大有倉乘賤易粟備用歲積至五十萬石歷陞右副都御史巡撫大同始至即選將訓兵綜理屯牧修舉廢墜未逾年卒

許進字季升靈寶人成化二年進士弘治元年為右僉都御史巡撫大同小王子久不進貢遣使千五百餘

人款關進以便宜納之請於朝詔許五百餘人至京  
師已而屢侵邊進被劾不問尋復窺邊進整軍待之  
新寧伯譚祐以京軍援寇乃遁去又乞通貢進再為  
請上許之時大同士馬威強邊防修整貢使每至關  
率下馬脫弓矢入館俛首聽命無敢譁會進與分守  
中官石岩相許岩徵還進亦謫兗州知府十三年火  
篩大舉犯大同邊將屢敗勅進與太監金輔平江伯  
陳銳率京軍禦之進仕至吏部尚書致仕卒贈太子

太保謚襄毅

張文燧遷安人弘治間以監知馬邑縣忠厚誠實吏畏  
民懷致仕歸士民思之

石玠字邦秀藁城人成化末與弟瑤同舉進士弘治中  
為御史出覈大同軍儲條奏悉中機宜正德中為右  
副都御史巡撫大同後官至戶部尚書歸卒玠有操  
行居官亦持正

薛敬之字顯思渭南人從蘭州周蕙游以歲貢生入國

學與同舍陳獻章並有盛名成化末為應州知州課績為天下第一弘治九年遷金華同知致仕卒

史琳字天瑞成化丙戌進士性坦夷宏豁不設崖岸喜談兵為給事巡按多建白三為提督初赴宣府大同值寇退治兵食以防其後尋以捷聞弘治乙丑宣府失利劇命出師琳與大帥分駐宣府大同諸路斬獲以百計捷再上褒諭如初特命中官迎勞於關錫賚甚厚終都察院右都御史卒於官贈太子太保賜葬

祭

洪漢字天章號雲一成化壬辰進士任部曹甚風厲歷陞右副都御史巡撫大同參贊軍務撫恤軍民搜剔蠹弊風紀振而邊境肅然上疏極言便益地方八事而增守備以專責任演神機以期實用置方田以遏北騎寬俸俸以惜逃官尤為八事中切要者因觸忤中官回籍

王獻臣字敬止其先吳人籍錦衣衛弘治六年進士為

御史巡大同邊還言自威遠失利士無戰心今復令修築邊垣豈勝畚鍤勞宜量修要害悉罷其餘且亟正諸將姚信陳廣閉營避寇及馬昇王杲秦恭喪師罪悉蠲大同延綏旱傷逋賦以寬軍民多獲允東廠以非理許奏遂杖謫人皆寃之終知縣

楊志學字遜夫徐州人弘治六年進士巡撫大同邊人愛之累官刑部尚書卒謚康惠

李介字守貞高密人成化五年進士歷兵部左侍郎弘

治十年寇謀犯大同命兼左僉都御史往督軍餉且經畧之比至寇已退乃大修戎備察核官田牛具錢還之軍以其資償軍所逋馬價邊人咸悅先後條上便宜二十事卒贈尚書

劉大夏華容人倣儻有大略持正不撓弘治十年大同行師乏糧大夏以戶部侍郎出經畫之或曰北邊糧草半屬京貴子弟公剛介此行恐取禍大夏曰處天下事以理不以勢定天下事在近不在遠候至彼圖



之既至詢咨父老得其要領揭榜通衢云某倉缺糧若干石每石給官銀若干凡境內外官員客商願輸者米自十石以上草自百束以上聽即中貴子弟不禁也不兩月倉場有餘積家有餘財邊事賴之尋為兵部尚書卒謚忠宣



山西通志卷九十三